



**Sud Bosne i Hercegovine**  
**Суд Босне и Херцеговине**

---

**Predmet broj: S 1 2 K 015636 14 K**

**Datum objave: 16.09.2015. godine**

---

**Sudeće vijeće**

**Hasija Mašović, predsjednik vijeća**

**Tatjana Kosović, član vijeća**

**Branko Perić, člana vijeća**

**PREDMET TUŽILAŠTVA BOSNE I HERCEGOVINE**  
**protiv**  
**Čule Tihomira**

---

**PRESUDA**

---

**Tužilac Tužilaštva Bosne i Hercegovine**

**Saša Sarajlić**

**Branilac optuženog**

**Advokat Temim**

## U IME BOSNE I HERCEGOVINE

Sud Bosne i Hercegovine, u vijeću sastavljenom od sudija, Mašović Hasije, kao predsjednika vijeća, te sudija Kosović Tatjane i Perić Branka, kao članova vijeća, uz sudjelovanje pravnog savjetnika-asistenta Hadžić Ilvane, u svojstvu zapisničara, u krivičnom predmetu protiv Čule Tihomira optuženog za krivično djelo Organizovani kriminal iz člana 250. stav 2. Krivičnog zakona Bosne i Hercegovine u vezi sa produženim krivičnim djelom Krijumčarenje ljudi iz člana 189. stav 1. KZ BiH, u vezi sa članom 54. KZ BiH, povodom optužnice Tužilaštva BiH broj T 20 0 KTPO 0008070 13 od 07.04.2014. godine, potvrđene 10.04.2014. godine, izmjenjene 27.08.2015. godine, i precizirane 10.09.2015. godine, nakon održanog ročišta za razmatranje sporazuma o priznanju krivice i pretresa za izricanje krivičnopravne sankcije, u prisutnosti tužioca Tužilaštva BiH, optuženog Čule Tihomira, i njegovog branioca Temim Seada, dana 16.09.2015. godine donio je sljedeću,

### PRESUDU

**Optuženi Čule Tihomir**, zvani Tiho, sin Mileta i majke Zore rođene Džeba, rođen 15.11.1970. godine u Mostaru, gdje je i nastanjen, Čula br. 51, pismen sa SSS, elektrotehničar, nezaposlen, oženjen, otac dvoje malodobne djece, po nacionalnosti ..., državljanin ... i ..., osuđivan, JMBG: ...

### KRIV JE

**Što je,**

**1.** dana 25.01.2013. godine, na području Općine Ljubuški, Čule Tihomir kao pripadnik grupe za Organizovani kriminal u smislu člana 1. stav 20. KZ BiH, zajedno sa Čepo Danijelom, Filipovićem Antom i Filipovićem Nikolom / koji se nalaze u Republici Hrvatskoj i nisu dostupni organima krivičnog gonjenja u BiH/, suprotno odredbama Konvencije UN protiv transnacionalnog organizovanog kriminala i protivno članu 6. Protokola protiv krijumčarenja migranata kopnenim, morskim i vazdušnim putem, iz BiH u Republiku Hrvatsku, na mjestu gdje prelazak državne granice nije dozvoljen, za novčani iznos od 920 eura, preveli tri državljanina Republike Turske, koji nisu imali putne isprave, sa kojima su se mogli slobodno kretati i prelaziti državnu granicu, na način da je Čule Tihomir, a nakon što mu je prethodno nepoznata osoba iz Republike Turske, putem „Western uniona“ poslala novac u iznosu od 520 eura, navedenog dana, u Mostaru, ispred Pansiona Vila Osa, u svoje putničko vozilo marke „Škoda Octavia“ registarskih oznaka ..., primio navedena tri državljanina Republike Turske, nepoznatog imena i prezimena, te ih ovim vozilom odvezao u mjesto Klobuk Općina Ljubuški, gdje su ova tri turska državljanina prešla u putničko vozilo marke „Mercedes“ registarskih oznaka ..., kojim je upravljao Čepo Danijel, koji je istim vozilom, došao do granice BiH sa Republikom Hrvatskom i na mjestu gdje prelazak državne granice nije dozvoljen, istim vozilom u kojem su se nalazili ovi migranti, prešao u Republiku Hrvatsku, gdje su ih odmah po prelasku granice, dočekali Filipović Ante i Filipović Nikola, koji su svojim putničkim vozilima otpratili Čepo Danijela idući ispred njega u namjeri da ga upozora na nailazak policije, koji je ove migrante dovezao do Splita, gdje su mu isti za ovu uslugu dali novac u iznosu od 400 eura, nakon čega su autobusom nastavili dalje putovanje ka zemljama zapadne Evrope,

2. dana 20.02.2013. godine, na području Općine Ljubuški, Čule Tihomir, kao pripadnik grupe za Organizovani kriminal u smislu člana 1. stav 20. KZ BiH, zajedno sa Čepo Danijelom, Filipovićem Antom i Filipovićem Nikolom / koji se nalaze u Republici Hrvatskoj i nisu dostupni organima krivičnog gonjenja u BiH/, suprotno odredbama Konvencije UN protiv transnacionalnog organizovanog kriminala i protivno članu 6. Protokola protiv krijumčarenja migranata kopnenim, morskim i vazdušnim putem, iz BiH u Republiku Hrvatsku, na mjestu gdje prelazak državne granice nije dozvoljen, za neutvrđeni iznos novca, preveli tri državljanina Republike Turske, koji nisu imali putne isprave, sa kojima su se mogli slobodno kretati i prelaziti državnu granicu, na način da je Čule Tihomir, a nakon što mu je prethodno njemu poznata osoba iz Republike Turske, putem „Western Uniona“ poslala neutvrđen iznos novca, navedenog dana, telefonom pozvao Čepo Danijela, te mu rekao da svojim putničkim vozilom ode do hotela „Ero“ u Mostaru i da u vozilo primi tri državljanina Republike Turske, nepoznatog imena i prezimena, što je ovaj i učinio, nakon čega je putničkim vozilom marke „Mercedes“ registarskih oznaka ... sa ovim migrantima otišao do Bolnice u Mostaru, gdje se Čule Tihomir nalazio na liječenju, da bi ovi migranti Čule Tihomiru dali neutvrđen iznos novca, od kog iznosa je ovaj Čepo Danijelu dao jedan neutvrđeni dio novčanog iznosa, nakon čega ih je Čepo Danijel, istim vozilom odveo do mjesta Kašće Općina Ljubuški, do granice BiH sa Republikom Hrvatskom i na mjestu gdje prelazak državne granice nije dozvoljen, ovim vozilom i sa migrantima, prešao u Republiku Hrvatsku, gdje su ga u mjestu Mijace sačekali Fgillipović Ante i Filipović Nikola, koji su ga putničkim vozilom nepoznate marke i nepoznate registarske oznake, idući ispred njega u namjeri da ga upozore na nailazak policije, otpratili do Splita, gdje su ovi migranti ušli u autobus i odvezli se ka zemljama zapadne Evrope,

3. dana 26.02.2013. godine, na području Općine Ljubuški, Čule Tihomir, kao pripadnik grupe za Organizovani kriminal u smislu člana 1. stav 20. KZ BiH, zajedno sa Čepo Danijelom, Filipovićem Antom i Filipovićem Nikolom / koji se nalaze u Republici Hrvatskoj i nisu dostupni organima krivičnog gonjenja u BiH/, suprotno odredbama Konvencije UN protiv transnacionalnog organizovanog kriminala i protivno čl. 6. Protokola protiv krijumčarenja migranata kopnenim, morskim i vazdušnim putem, iz BiH u Republiku Hrvatsku, na mjestu gdje prelazak državne granice nije dozvoljen, za iznos od 300 eura, preveli jednog državljanina Republike Turske koji nije imao putne isprave, sa kojima se mogao slobodno kretati i prelaziti državnu granicu, na način da je Čule Tihomir, a nakon što se prethodno dogovorio sa njemu poznatom osobom iz Republike Turske, navedenog dana, telefonom pozvao Čepo Danijela, te mu rekao da svojim putničkim vozilom ode do autobuske stanice u Mostaru i da u vozilo primi jednog državljanina Republike Turske, nepoznatog imena i prezimena, što je ovaj i učinio, nakon čega je putničkim vozilom marke „BMV“ registarskih oznaka ..., sa ovim migrantom otišao do Gradske bolnice u Mostaru, gdje se Čule Tihomir nalazio na liječenju i gdje je ovaj migrant, Čule Tihomiru dao novac u iznosu od 300 eura, od kog iznosa je ovaj dao Čepo Danijelu iznos od 150 eura, nakon čega ga je Čepo Danijel, za ovaj iznos novca, ovim putničkim vozilom migranta odveo do Ljubuškog, gdje ga je, smjestio na nepoznatoj adresi, na kojoj je proveo noć, da bi dana 27.03.2013. godine, istim putničkim vozilom došao po njega i odveo ga u mjesto Klobuk, do granice BiH sa Republikom Hrvatskom i na mjestu gdje prelazak državne granice nije dozvoljen, navedenim putničkim vozilom, istog preveo u Republiku Hrvatsku, gdje su ga u mjestu Mijace sačekali Filipović Ante i Filipović Nikola, koji su ga putničkim vozilom nepoznate marke i nepoznate registarske oznake, idući ispred njega u manjeri da ga upozore na nailazak policije, otpratili do Splita, pa kada je stigao u Split, ovaj migrant je ušao u autobus i nastavio dalje put ka zemljama zapadne Evrope,

4. u periodu od 02.03.2013. godine, pa do 04.03.2013. godine, na području Općine Ljubuški, Čule Tihomir, kao pripadnik grupe za Organizovani kriminal u smislu člana 1. stav 20. KZ BiH, zajedno sa Čepo Danijelom, Jahura Feđom, Filipović Nikolom i Filipović Antom/ koji se nalaze u Republici Hrvatskoj i nisu dostupni organima krivičnog gonjenja u BiH, suprotno odredbama Konvencije UN protiv transnacionalnog organizovanog kriminala i protivno članu 6. Protokola protiv krijumčarenja migranata kopnenim, morskim i vazdušnim putem, iz BiH u Republiku Hrvatsku, na mjestu gdje prelazak državne granice nije dozvoljen, za iznos po 350 eura po osobi, preveli trojicu migranata državljana Republike Turske, koji nisu imali putne isprave, sa kojima su se mogli slobodno kretati i prelaziti državnu granicu, na način da je Čule Tihomir, dana 02.03.2013. godine, na autobuskoj stanici u Mostaru, sačekao trojicu migranata državljana Republike Turske, nepoznatog imena i prezimena, koji su autobusom doputovali iz Tuzle, primio ih u svoje putničko vozilo marke „Škoda Octavia“ registarske oznake ... i odvezao ih u pansion „Nadin“ gdje ih je primio vlasnik ovog pansiona, Jahura Feđa, koji je znao da su to migranti koji su ilegalno ušli u BiH i da će ilegalno napustiti BiH, da bi se isti u ovom pansionu zadržali do 04.03.2013. godine, kada ih je Čule Tihomir, svojim već pomenutim putničkim vozilom odvezao u Međugorje, gdje ih je Čepo Danijel, primio u svoje putničko vozilo marke „Mini Moris“ registarske oznake ..., te ih odvezao u mjesto Kašće općina Ljubuški i na mjestu gdje prelazak državne granice nije dozvoljen, ovim vozilom, zajedno sa migrantima, iz BiH prešao u Republiku Hrvatsku, te nastavio putovanje ka Splitu, pa kada je stigao u Split, ove migrante je odvezao do autobuske stanice, odakle su isti autobusom nastavili dalje putovanje ka zemljama zapadne Evrope,

5. u periodu od 27.03.2013. godine, pa do 28.03.2013. godine, na području Općine Ljubuški, Čule Tihomir, kao pripadnik grupe za Organizovani kriminal u smislu člana 1. stav 20. KZ BiH, zajedno sa Čepo Danijelom, Derviškadić Vedranom i Filipovićem Nikolom / koji se nalazi u Republici Hrvatskoj i nije dostupan organima krivičnog gonjenja u BiH, suprotno odredbama Konvencije UN protiv transnacionalnog organizovanog kriminala i protivno članu 6. Protokola protiv krijumčarenja migranata kopnenim, morskim i vazdušnim putem, iz BiH u Republiku Hrvatsku, na mjestu gdje prelazak državne granice nije dozvoljen, za neutvrđen iznos novca, preveli četvoricu migranata državljana Republike Srbije, sa Kosova, i to Sylja Paci Valentina, Paci Driton, Muqaj Sali i Muqaj Zoje, koji nisu imali putne isprave, sa kojima su se mogli slobodno kretati i prelaziti državnu granicu, na način da je Vedran Derviškadić, koji je u svoj motel primio migrante za koje je znao da su ilegalno ušli u BiH, telefonom pozvao Čule Tihomira i rekao mu da su u Mostaru, u njegovom motelu, smještena sedmorica migranata iz Republike Srbije, sa Kosova, koji trebaju ilegalno da odputuju u Republiku Hrvatsku, pa je Čule Tihomir otišao do ovog motela, potom pozvao Čepo Danijela, da svojim putničkim vozilom dođe na ovo mjesto, koji je to i učinio, pa kada je došao, u putničko vozilo nepoznate marke i nepoznate registarske oznake, primio je četvoricu ovih migranata, potom je iste odvezao do mjesta Kašće-Mijaci općina Ljubuški, pa je na mjestu, gdje prelazak državne granice nije dozvoljen, pokušao iz BiH preći u Republiku Hrvatsku, ali je odustao od toga, iz razloga što mu je Nikola Filipović iz Republike Hrvatske, uputio upozorenje da ilegalni prelazak državne granice nije bezbjedan i da bi mogao biti otkriven od strane granične policije, zbog čega je odustao i ove migrante, smjestio na nepoznatom mjestu, gdje su proveli noć, da bi sutradan, 28.03.2013. godine, na istom mjestu kao prethodnog dana, istim putničkim vozilom, u kojem su se nalazili migranti, prešao iz BiH u Republiku Hrvatsku i odvezao ih do Splita, odakle su ovi migranti autobusom nastavili putovanje ka zemljama zapadne Evrope,

6. u periodu od 01.04.2013. godine, pa do 02.04.2013. godine, na području Općine Ljubuški, Čule Tihomir, kao pripadnik grupe za Organizovani kriminal u smislu člana 1. stav 20. KZ BiH, zajedno sa Čepo Danijelom, Filipovićem Antom i Filipovićem Nikolom / koji se nalaze u Republici Hrvatskoj i nisu dostupni organima krivičnog gonjenja u BiH, suprotno odredbama Konvencije UN protiv transnacionalnog organizovanog kriminala i protivno člana 6. Protokola protiv krijumčarenja migranata kopnenim, morskim i vazdušnim putem, iz BiH u Republiku Hrvatsku, na mjestu gdje prelazak državne granice nije dozvoljen, za neutvrđen iznos novca, preveli dva migranta, državljana Republike Turske, i to Kayran Ramazana i Muslum Karabasa, koji nisu imali putne isprave, sa kojima su se mogli slobodno kretati i prelaziti državnu granicu, na način da je Čule Tihomir, svojim putničkim vozilom marke „Škoda Octavia“ registarskih oznaka ..., do Ljubuškog odveo ovu dvojicu migranata, gdje ih je dočekaao Čepo Danijel, i svojim putničkim vozilom nepoznate marke i nepoznatog registarskog broja, ove migrante odveo do mjesta Kašće – Mijace i na mjestu gdje prelazak državne granice nije dozvoljen, iz BiH prešao u Republiku Hrvatsku, gdje su ga sačekali Filipović Nikola i Filipović Ante, koji su ga opratili do Splita, tako što su putničkim vozilom nepoznate marke i nepoznate registarske oznake, išli ispred njega, u namjeri da ga upozore na nailazak policije, pa kada su došli na autobusku stanicu u Splitu, ova dva migranta su ušla u autobus, u namjeri da nastave dalje putovanje ka zemljama zapadne Evrope, da bi u blizini Zagreba, prilikom kontrole, bili otkriveni od strane policije Republike Hrvatske i nakon toga vraćeni u BiH.

7. dana 02.04.2013. godine, na području Općine Ljubuški, Čule Tihomir, kao pripadnik grupe za Organizovani kriminal u smislu člana 1. stav 20. KZ BiH, zajedno sa Čepo Danijelom, Murtezi Fatmirom i Derviškadić Vedranom, suprotno odredbama Konvencije UN protiv transnacionalnog organizovanog kriminala i protivno člana 6. Protokola protiv krijumčarenja migranata kopnenim, morskim i vazdušnim putem, iz BiH u Republiku Hrvatsku, na mjestu gdje prelazak državne granice nije dozvoljen, za neutvrđen iznos novca, preveli šest migranata državljana Srbije, sa područja Kosova, koji nisu imali putne isprave, sa kojima su se mogli slobodno kretati i prelaziti državnu granicu, na način da je Murtezi Fatmir, u namjeri da im obezbjedi ilegalan odlazak ka zemljama zapadne Evrope, na neutvrđen način, po dogovoru sa Čule Tihomirom, iz Republike Srbije, sa Kosova, u Mostar doveo šestoricu migranata, nepoznatog imena i prezimena, što je ovaj i učinio, pa kada ih je doveo, smjestio ih je u motel vlasništvo Derviškadić Vedrana, koji ih je primio, iako je znao da su to migranti koji su ilegalno ušli u BiH i da će ilegalno napustiti BiH, pa im je pored toga dozvolio da borave u njegovom pansionu, nakon čega je Derviškadić Vedran pozvao Čule Tihomira, koji je došao po njegovom pozivu, pa su obojica, u svoja putnička vozila nepoznate marke i nepoznate registarske oznake, smjestili ovih šest migranata, te ih odvezli na područje opštine Ljubuški, gdje ih je sačekao Čepo Danijel i primio ih u svoje putničko vozilo nepoznate marke i nepoznatog registarskog broja, te ih odveo u mjesto Kašće – Mijace i na mjestu gdje prelazak državne granice nije dozvoljen iz BiH prešao u Republiku Hrvatsku, te dalje sa ovim migrantima otputovao do Splita odakle je ovih šest migranata autobusom nastavilo dalje put ka zemljama Zapadne Evrope.

8. u periodu od 04.04.2013. godine, pa do 08.04.2013. godine, na području Općine Ljubuški, Čule Tihomir, kao pripadnik grupe za Organizovani kriminal u smislu člana 1. stav 20. KZ BiH, zajedno sa Puljić Denisom, Boras Željkom, Boras Milijanom i Jahura Feđom, suprotno odredbama Konvencije UN protiv transnacionalnog organizovanog kriminala i protivno čl. 6. Protokola protiv krijumčarenja migranata kopnenim, morskim i

vazdušnim putem, iz BiH u Republiku Hrvatsku, na mjestu gdje prelazak državne granice nije dozvoljen, za neutvrđen iznos novca, preveli četiri migranta državljana Republike Turske, i to Ozkan Karagun, Sedat Bakir, Cimen Mahmut i Giyacettin Bulut, koji nisu imali putne isprave, sa kojima su se mogli slobodno kretati i prelaziti državnu granicu, na način da je Puljić Denis sa svojim putničkim motornim vozilom marke „Golf II“ registarskog broja ... došao pred pansion Nadin vlasništvo Jahura Feđe, koji ih je držao kao goste, iako je znao da su to migranti koji su ilegalno ušli u BiH i koji će ilegalno napustiti teritoriju BiH, ali im je i pored toga omogućio da u njegovom pansionu borave i sačekaju dalje prebacivanje van BiH, pa je Puljić Denis, ove migrante svojim vozilom odveo do mjesta Podprolog, općina Ljubuški, gdje su se u neposrednoj blizini državne granice zaustavili i na mjestu gdje nije dozvoljen prelazak državne granice, Puljić Denis je pješke preveo ova četiri migranta iz BiH u Republiku Hrvatsku, potom se pješke vratio u BiH i putničkim vozilom kojim se doveo, otišao na granični prelaz Crveni Grm gdje je legalno iz BiH prešao u Republiku Hrvatsku, zatim došao do mjesta gdje je ilegalno preveo i ostavio migrante u Republici Hrvatskoj, iste ponovo primio u svoje putničko vozilo, te krenuo prema Splitu, dok su za vrijeme putovanja prema Splitu, ispred njega u putničkom vozilu marke „BMW X5“ registarskog broja ..., išli Boras Milijan koji je upravljao ovim vozilom i Boras Željka koja se nalazila u vozilu, sa zadatkom da prate Puljić Denisa i da ga upozore na eventualni nailazak policije, te su tako doputovali do Splita, gdje su ove migrante smjestili u autobus, da bi iste kroz kratko vrijeme otkrila policija Republike Hrvatske, te ih vratila u BiH.

**9.** dana 13.04.2013. godine, Čule Tihomir, kao pripadnik grupe za Organizovani kriminal u smislu člana 1. stav 20. KZ BiH, zajedno sa Murtezi Fatmirom, Čepo Danijelom i Jahura suprotno odredbama Konvencije UN protiv transnacionalnog organizovanog kriminala i protivno čl. 6. Protokola protiv krijumčarenja migranata kopnenim, morskim i vazdušnim putem, iz BiH u Republiku Hrvatsku, na mjestu gdje prelazak državne granice nije dozvoljen, za neutvrđen iznos novca, preveli dvanaest migranata državljana Republike Srbije, sa područja Kosova, i to Xemajli Besim, Xemajli Ramize, Xemajli Leonita, Xemajli Leon, Zymeri Nerxhivane, Zymeri Drin, Zymeri Suela, Zymeri Gezim, Muqaj Zoe, Muqaj Sali, Syila Xhelil i Osmani Durim, koji nisu imali putne isprave, sa kojima su se mogli slobodno kretati i prelaziti državnu granicu, na način da je Murtezi Fatmir telefonom kontaktirao Čule Tihomira i rekao mu da ima dvanaest migranata koje treba prevesti iz BiH u Republiku Hrvatsku, nakon čega je Murtezi Fatmir, u namjeri da im obezbjedi ilegalan odlazak u zemlje zapadne Evrope, na neutvrđen način, sa ovih dvanaest migranata ušao u BiH, došao do Sarajeva, gdje je iznajmio tri taxi vozila, u koje je smjestio ove migrante po prethodnom dogovoru sa Čule Tihomirom, sa istima se odveo u Mostar, gdje ih je ovaj na ulazu ugrad sačekao te ih odveo do pansiona Nadin, vlasništvo Jahura Feđe, koji ih je primio da u njegovom pansionu sačekaju dalje prebacivanje van BiH, iako je znao da su to migranti koji će ilegalno napustiti BiH, da bi u toku večernjih sati, u ovaj pansion došao Čepo Danijel i u teretno vozilo marke „Peugeot Boxer“ registarskog broja .... , primio ovih dvanaest migranata, nakon čega se uputio prema mjestu Kašće – Mijaci i na mjestu gdje nije dozvoljen prelazak državne granice, iz BiH prešao u Republiku Hrvatsku, odakle je dalje nastavio put prema Splitu, odakle je ovih šest migranata autobusom nastavilo dalje put ka zemljama Zapadne Evrope.

**10.** u periodu od 26.04.2013. godine, pa do 29.04.2013. godine, Čule Tihomir, kao pripadnik grupe za Organizovani kriminal u smislu člana 1. stav 20. KZ BiH, zajedno sa Murtezi Fatmirom, Čepo Danijelom i Martinović Nikolom, suprotno odredbama Konvencije UN protiv transnacionalnog organizovanog kriminala i protivno čl. 6. Protokola protiv

krijumčarenja migranata kopnenim, morskim i vazdušnim putem, iz BiH u Republiku Hrvatsku, na mjestu gdje prelazak državne granice nije dozvoljen, za neutvrđen iznos novca, preveli četrnaest migranata državljana Republike Srbije, sa područja Kosova koji nisu imali putne isprave, sa kojima su se mogli slobodno kretati i prelaziti državnu granicu, na način da je Murtezi Fatmir telefonom kontaktirao Čule Tihomira i rekao mu da ima četrnaest migranata koje treba prevesti iz BiH u Republiku Hrvatsku, nakon čega je Murtezi Fatmir na neutvrđen način, sa ovim migrantima ušao u BiH, došao do Sarajeva, gdje je iznajmio tri taxi vozila, u koje je smjestio ove migrante i sa istima se odvezao u Čitluk, u pansion „Anna-Neri“ vlasništvo Martinović Nikole, koji je primio ove migrante, znajući za iste da će BiH napustiti na ilegalan način, da bi tog istog dana Čepo Danijel putničkim motornim vozilom marke „VW Golf „, registarskog broja ...., prevezao šestoricu migranata do mjesta Kašće – Mijace, gdje je na mjestu gdje nije dozvoljen prelazak državne granice, iz BiH prešao u Republiku Hrvatsku i ove migrante odvezao do Splita, nakon čega se vratio u BiH, da bi dana 28.04.2013 godine, putničkim motornim vozilom „VW Passat“ , registarskog broja .... , ponovo iz pansiona „Anna –Neri“, u ovo vozilo primio osam migranata, te se sa istima uputio u mjesto Kašće – Mijace, gdje na pjestu gdje prelazak državne granice nije dozvoljen, pokušao iz BiH preći u Republiku Hrvatsku, u čemu nije uspio, pa ih je smjestio na nepoznato mjesto, da bi sutradan 29.04.2013. godine, uspio preći u Republiku Hrvatsku, te ove migrante odvezao do Splita odakle je ovih šest migranata autobusom nastavilo dalje put ka zemljama Zapadne Evrope.

**Čime je** počinio krivično djelo Organizovani kriminal iz član 250. stav 2. Krivičnog zakona Bosne i Hercegovine, u vezi sa produženim krivičnim djelom Krijumčarenje ljudi iz člana 189. stav 1. KZ BiH, u vezi sa članom 54. KZ BiH.

**pa ga Sud**, primjenom navedenih zakonskih odredbi i na osnovu odredbi člana 42. KZ BiH i člana 48. KZ BiH, primjenjujući odredbe o ublažavanju kazne u smislu člana 49. KZ BiH i člana 50. KZ BiH.

## **OSUĐUJE NA KAZNU ZATVORA U TRAJANJU OD 2 /dvije/ GODINE**

Na osnovu primjene odredbe iz člana 56. Krivičnog zakona BiH, optuženom Čule Tihomiru se u izrečenu kaznu zatvora uračunava vrijeme provedeno u pritvoru u periodu od 15.05.2013. godine do 31.05.2013. godine.

Od optuženog se na osnovu člana 110. i 111. Krivičnog zakona BiH, a u vezi sa članom 392. Zakona o krivičnom postupku BiH, oduzima imovinska korist pribavljena izvršenjem krivičnog djela i to novac u iznosu od 433,00 eura (četiristotinetrdesettri eura ) odnosno njegova protuvrijednost izražena u konvertibilnim markama, prema važećem kursu Centralne banke Bosne i Hercegovine na dan uplate, te se optuženi obavezuje da navedeni novčani iznos uplati na račun države Bosne i Hercegovine putem jedne od poslovnih banaka u roku od 30 dana od dana pravosnažnosti presude.

Na osnovu člana 188. stav 1. ZKP BiH, optuženi se obavezuje da naknadi troškove krivičnog postupka utvrđene paušalno u iznosu od 200 KM (dvijestotine konvertibilnih maraka), dok se na osnovu člana 188. stav 4. ZKP BiH, oslobađa troškova učinjenih za odbranu po službenoj dužnosti i troškove za svjedoke, s obzirom da bi obavezom

plaćanja istih bilo dovedeno u pitanje izdržavanje kako optuženog tako i osoba koje je dužan izdržavati.

## O b r a z l o ž e n j e

Tužilaštvo BiH je 07.04.2014. godine podiglo optužnicu broj T 20 0 KT 0008224 13 kojom je Čule Tihomira, Derviškadić Vedrana, Jahura Feđu, Čepo Danijela, Boras Milijana, Puljić Denisa, Boras Željku, Martinović Nikolu i Murtezi Fatmira optužilo za počinjenje krivičnog djela Organizovani kriminal iz člana 250. stav 2. i 3. KZ BiH u vezi sa krivičnim djelom Krijumčarenje ljudi iz člana 189. stav 1. KZ BiH. Predmetna optužnica je od strane sudije za prethodno saslušanje potvrđena dana 28.04.2014. godine. Nakon održanog ročišta za izjašnjenje o krivnji, na kojem su se optuženi izjasnili da nisu krivi, predmetni spis je upućen sudećem vijeću u cilju zakazivanja glavnog pretresa.

Dana 25.08.2014. godine pred pretresnim vijećem Suda BiH, čitanjem optužnice Tužilaštva BiH, počeo je glavni pretres u ovom predmetu.

Sud je u toku postupka, u smislu člana 26. ZKP BiH, nakon zaprimanja sporazuma o priznanju krivice donio rješenja kojima se postupci prema optuženima koji su sklopili sporazum o priznanju krivice, razdvaja od postupka protiv optuženog Čule Tihomira, u kojim posebnim postupcima su donesene presude kako slijedi - ....( optuženi Boras Milijan ); .... ( optuženi Derviškadić Vedran); ..... godine ( optužena Boras Željka ); .... ( optuženi Martinović Nikola ); .... ( optuženi Puljić Denis) i .... ( optuženi Čepo Danijel); ..... ( optuženi Jahura Feđa ). Takođe, razdvojen je i postupak protiv optuženog Murtezi Fatmira koji je u toku glavnog pretresa dao izjavu kojom je priznao izvršenje krivičnog djela, te je donesena presuda .....

Sud je u toku glavnog pretresa protiv optuženog Čule Tihomira, odnosno u toku izvođenja dokaza optužbe, dana 01.09.2015. godine zaprimio sporazum broj T 20 0 KT 0008224 13 od 27.08.2015. godine, o priznanju krivice zaključenog između optuženog Čule Tihomira i njegovog branioca, advokata Temim Seada, sa postupajućim tužiocem Tužilaštva BiH.

Navedenim sporazumom izmjenjen je činjenični opis tačaka 1. do 10. optužnice, te pravna kvalifikacija krivičnog djela, na način da je predmetnim sporazumom optuženi Čule Tihomir priznao krivicu za izvršenje krivičnog djela Organizovanja grupe ili udruženja za izvršenje krivičnih djela trgovine ljudima i krijumčarenje migranata iz člana 189a. stav 1. KZ BiH, vezi sa krivičnim djelom Krijumčarenje migranata iz člana 189. stav 1. KZ BiH, izvršeno na način opisan u sporazumom izmjenjenoj optužnici, te prihvatio da mu za navedeno krivično djelo Sud izrekne kazna zatvora u rasponu od 2 ( dvije ) godine do 5 ( pet ) godina.

Na ročištu za razmatranje sporazuma, dana 10.09.2015. godine, tužilac je uz saglasnost odbrane na zapisnik izvršio izmjenu u činjeničnom opisu optužnice na način da optuženom Čule Tihomiru stavlja na teret da je radnje izvršenja krivičnog djela Krijumčarenje počinio u svojstvu pripadnika grupe za organizovani kriminal u smislu odredbe člana 1. stav 20. KZ BiH, čime je izmjenjena i pravna kvalifikacija krivičnog djela koje se stavlja na teret optuženom, odnosno optuženom se stavlja na teret krivično djelo Organizovani kriminal iz člana 250. stav 2. KZ BiH u vezi sa krivičnim djelom Krijumčarenje ljudi iz člana 189. stav 1. KZ BiH. Sa ovim dodatnim izmjenama zaključenog sporazuma, odbrana se saglasila.

Nakon toga je Sud provjerio i utvrdio, u smislu odredbe člana 231. ZKP BiH, da je do zaključenja sporazuma došlo dobrovoljno, svjesno i sa razumijevanjem, da je optuženi upoznat sa mogućim posljedicama zaključenja sporazuma koje se odnose na odricanje od prava na suđenje, da ne može uložiti žalbu na vrstu procesa i krivičnopravnu sankciju, te da mu se mogu dosuditi troškovi krivičnog postupka.

Na ročištu za razmatranje sporazuma o priznanju krivice optuženi Čule Tihomir je pred Sudom izjavio da se osjeća krivim za djelo koje mu je stavljeno na teret, izvršeno na način i u vrijeme navedeno u izmjenjenoj optužnici. Takođe je izjavio da u vrijeme zaključenja sporazuma na njega nije vršen bilo kakav pritisak da zaključi sporazum, te da je u to vrijeme kao i u vrijeme razmatranja sporazuma o priznanju krivice potpuno svjesno, svojom voljom, zaključio sporazum i dao izjavu o priznanju krivice. Prilikom razmatranja izjave o priznanju krivice, Sud je ocijenio da je optuženi razumio da se sporazumom odriče prava na suđenje i da ne može uložiti žalbu na krivičnopravnu sankciju, koja će mu se izreći

Sud je razmatrajući izjavu o priznanju krivice u skladu sa odredbom člana 231. ZKP BiH, i cijeneći pri tom dokaze koje je Tužilaštvo sadržajno iznijelo i prezentiralo, kako tokom glavnog pretresa, tako tokom ročišta za razmatranje izjave o priznanju krivice, odlučio prihvatiti izjavu o priznanju krivice optuženog nalazeći da je isti počinio krivično djelo iz optužnice, izmjenjeno potpisanim sporazumom, i precizirano na ročištu za razmatranje sporazuma.

Pri tome je pred Sudom sadržajno iznesena i u sudski spis uvrštena sljedeća materijalna dokumentacija Tužilaštva BiH<sup>1</sup> - **DT 1.1.** Transkripti – **dogadžaj I**, Granična policija BiH, CIU Sarajevo, broj: 17-08-2-04-25-860/12 od 27.05.2013. godine, **DT 1.2.** Informacija MUP Republike Hrvatske (e-mail) od 25.04.2013. godine – prelazak državne granice za lice Čepo Danijel, **DT 2.1.** Transkripti – **dogadžaj II**, Granična policija BiH, CIU Sarajevo, broj: 17-08-2-04-25-860/12 od 27.05.2013. godine, **DT 2.2.** Izvod iz evidencije prelaska državne granice za lice Čepo Danijel, Granični prelaz Orahovlje, za dan 21.02.2013. godine, **DT 3.1.** Transkripti – **dogadžaj III**, Granična policija BiH, CIU Sarajevo, broj: 17-08-2-04-25-860/12 od 27.05.2013. godine, **DT 3.2.** Izvod iz evidencije prelaska državne granice za lice Čepo Danijel, Granični prelaz Osoje, za dan 28.02.2013. godine, **DT 3.3.** Ugovor o najmu vozila broj: 010/13, između Čepo Danijela i Rent-a-Car Individual, Posušje, za period od 25.02.2013. godine do 02.03.2013. godine, **DT 4.** Transkripti – dogadžaj IV, Granična policija BiH, CIU Sarajevo, broj: 17-08-2-04-25-860/12 od 27.05.2013. godine, **DT 5.** Transkripti – dogadžaj V, Granična policija BiH, CIU Sarajevo, broj: 17-08-2-04-25-860/12 od 27.05.2013. godine, **DT 6.1.** Transkripti – dogadžaj VI, Granična policija BiH, CIU Sarajevo, broj: 17-08-2-04-25-860/12 od 27.05.2013. godine, **DT 6.2.** Informacija MUP Republike Hrvatske (e-mail) od 25.04.2013. godine – prelazak državne granice za lice Čepo Danijel, **DT 6.3.** Zapisnik o saslušanju svjedoka Karabas Muslum, Granična policija BiH – Centralni istražni ured Sarajevo, br. 17-08-2-04-21/13 od 05.04.2013. godine, **DT 6.4.** Zapisnik o saslušanju svjedoka Kayran Ramazan, Granična policija BiH – Centralni

---

<sup>1</sup> Dokazi koji se odnose na tačke 1, 2, 3 i 7 optužnice uloženi su na ročištu za nastavak glavnog pretresa održanom dana 27.08.2015. godine. Ostali dokazi su uloženi na ročištu za razmatranje sporazuma o priznanju krivice održanom dana 10.09.2015. godine.

istražni ured Sarajevo, br. 17-08-2-04-22/13 od 05.04.2013. godine, **DT 7.** Transkripti – **događaj VII**, Granična policija BiH, CIU Sarajevo, broj: 17-08-2-04-25-860/12 od 27.05.2013. godine, **DT 8.1.** Transkripti – događaj VIII, Granična policija BiH, CIU Sarajevo, broj: 17-08-2-04-25-860/12 od 27.05.2013. godine, **DT 8.2.** Zapisnik o saslušanju svjedoka Ozkan Karagun, Granična policija BiH – Centralni istražni ured Sarajevo, br. 17-08-2-04-26/13 od 11.04.2013. godine, **DT 8.3.** Zapisnik o saslušanju svjedoka Sedat Bakir, Granična policija BiH – Centralni istražni ured Sarajevo, br. 17-08-2-04-27/13 od 11.04.2013. godine, **DT 8.4.** Zapisnik o saslušanju svjedoka Mahmut Cimen, Granična policija BiH – Centralni istražni ured Sarajevo, br. 17-08-2-04-28/13 od 12.04.2013. godine, **DT 8.5.** Zapisnik o saslušanju svjedoka Giyasettin Bulut, Granična policija BiH – Centralni istražni ured Sarajevo, br. 17-08-2-04-29/13 od 12.04.2013. godine, **DT 8.6.** Informacija MUP Republike Hrvatske (e-mail) od 25.04.2013. godine – prelazak državne granice za lice Puljić Denis, **DT 9.1.** Transkripti – događaj IX, Granična policija BiH, CIU Sarajevo, broj: 17-08-2-04-25-860/12 od 27.05.2013. godine, **DT 9.2.** Ugovor o najmu vozila broj: 44/13, između Čepo Danijela i Rent-a-Car AutoCentar zelić LKW, Ljubuški, za period od 13.04.2013. godine do 14.04.2013. godine, **DT 9.3.** Zapisnik o saslušanju svjedoka Šehić Hajrudina, Granična policija BiH, CIU Sarajevo, br. 17-08-2-49/13 od 23.05.2013. godine, **DT 9.4.** Zapisnik o saslušanju svjedoka Mišić Šemsudina, Granična policija BiH, CIU Sarajevo, br. 17-08-2-51/13 od 23.05.2013. godine, **DT 9.5.** Zapisnik o saslušanju svjedoka Bilalić Bahrudina, Granična policija BiH, CIU Sarajevo, br. 17-08-2-57/13 od 04.06.2013. godine, **DT 10.1.** Transkripti – događaj X, Granična policija BiH, CIU Sarajevo, broj: 17-08-2-04-25-860/12 od 27.05.2013. godine, **DT 10.2.** Zapisnik o saslušanju svjedoka Kurudžija Zebo, Granična policija BiH, CIU Sarajevo, br. 17-08-2-50/13 od 23.05.2013. godine, **DT 10.3.** Zapisnik o saslušanju svjedoka Hadžiahmetović Sulejmana, Granična policija BiH, CIU Sarajevo, br. 17-08-2-58/13 od 04.06.2013. godine, **DT 11.** Izveštaj o provedenim aktivnostima na izvršenju posebne istražne radnje Tajno praćenje i tehničko snimanje osoba, transportnih sredstava i predmeta koji stoje u vezi s njima iz čl. 116. stav 2. tačka d) ZKP BiH, broj: 17-08-5-04-25-83/13-2 od 08.05.2013. godine uz jedan DVD medij, **DT 12.** Izveštaj o počinjenom krivičnom djelu i izvršiocima, Granična policija BiH, Centralni istražni ured Sarajevo, broj: 17-08-2-04-13-5-KU-04/13 od 06.05.2013. godine, **DT 13.** Dopuna Izveštaja o počinjenom krivičnom djelu i izvršiocima, Granična policija BiH, Centralni istražni ured Sarajevo, broj: 17-08-2-04-13-5-KU-06/13 od 13.06.2013. godine, **DT 14.** Izveštaj o provođenju posebnih istražnih radnji, Granična policija BiH, Centralna istražna kancelarija, broj: 17-08-2-04-25-860/12 od 13.06.2013. godine uz 2x CD medij, **DT 15.** Analiza i objašnjenje grafičkog prikaza ostvarenih kontakata u OA „Jug“, za vremenski period od 25.01.2013. godine do 29.04.2013. godine, Granična policija BiH, Centralna istražna kancelarija, broj: 17-08-3-int-955/13 od 29.11.2013. godine uz 3x DVD medij, **DT 16.** Izveštaj o izvršenoj digitalnoj forenzičkoj analizi mobitela i SIM kartica 1/2, Granična policija BiH, Centralni istražni ured, broj: 17-08-1-FT+006/13 od 18.07.2013. godine, **DT 17.** Izveštaj o izvršenoj digitalnoj forenzičkoj analizi mobitela i SIM kartica 2/2, Granična policija BiH, Centralni istražni ured, broj: 17-08-1-FT+006/13 od 18.07.2013. godine, uz 4x DVD i 1x CD medij, **DT 18.** Izvod iz Tenfore – Western Union korisničkog centra, za lice Čule Tihomir, za period od 25.01.2013. godine do 20.05.2013. godine, **DT 19.** Zapisnik o pretresanju, Granična policija BiH, CIU, broj: 17-08-2-04-25-860/12-II-5, od 14.05.2013. godine, za lice Čule Tihomir, **DT 20.** Potvrda o privremenom oduzimanju predmeta, Granična policija BiH, CIU, broj: 17-08-2-22/13, od 14.05.2013. godine, na ime Čule Franka (za lice Čule Tihomir), **DT 21.** Fotodokumentacija sa pretresa, Granična policija BiH, CIU, broj: 17-08-2-04-25-860/12 od 14.05.2013. godine, za lice Čule Tihomir, **DT 38.** Izvod iz kaznene evidencije za lice Čule Tihomir, MUP Hercegovačko-neretvanskog kantona, PU Ljubuški, broj: 02-02/5-2-12-16/2014 od

21.01.2014. godine, **DT 46**. Zapisnik Tužilaštva BiH o saslušanju svjedoka Husomanović Edin, broj T20 0 KT 0008224 13, od 25.02.2014. godine, **DT 47**. Zapisnik Tužilaštva BiH o saslušanju svjedoka Kriještorac Sanja, broj T20 0 KT 0008224 13, od 25.02.2014. godine, **DT 48**. Zapisnik Tužilaštva BiH o saslušanju svjedoka Stupić Zoran, broj T20 0 KT 0008224 13, od 07.03.2014. godine, **DT 49**. Zapisnik Tužilaštva BiH o saslušanju svjedoka Stipić Rudolf, broj T20 0 KT 0008224 13, od 10.03.2014. godine, **DT 50**. Zapisnik Tužilaštva BiH o ispitivanju osumnjičenog Čule Tihomira, broj T20 0 KT 0006279 13, od 16.05.2013. godine, **DT 51**. Zapisnik Tužilaštva BiH o ispitivanju osumnjičenog Čule Tihomira, broj T20 0 KT 0006279 13, od 28.05.2013. godine.

Odbrana je na zapisnik potvrdila da posjeduje dokaze na kojima se optužnica zasniva i izjavila da na iste nema prigovora.

Dakle, iz navedenih dokaza koje je Tužilaštvo BiH prezentiralo kako tokom glavnog pretresa, kao i tokom ročišta o razmatranju sporazuma o priznanju krivice, proizilazi dovoljno dokaza koji upućuju na zaključak da je optuženi kao pripadnik grupe za organizovani kriminal koja je u cilju sticanja protivpravne imovinske koristi, na odlučujući način, zajedničkim djelovanjem sa ostalim pripadnicima grupe, međusobnom podjelom uloga, doprinio učinjenju krivičnog djela Krijumčarenja ljudi. Iz presretnutih relevantnih telefonskih razgovora koji se odnose na događaje iz predmetne optužnice i iz zapisnika saslušanih svjedoka iz istrage, Sud je utvrdio da dokazi potvrđuju krivicu optuženog za krivičnopravne radnje.

Izjave svjedoka, vozača taksi vozila iz Sarajeva, potvrđuju navode da su sa autobuske stanice u Sarajevu, od strane njima nepoznatog lica za novčanu naknadu u iznosu od po 80 eura po vozilu, vršili prevoz više lica do područja Hercegovine. Svjedoci su naveli da se radilo o „*strancima*“ koji nisu govorili lokalnim jezikom, i da je glavni među njima bila osoba koja je „*stalno bila na telefonu*“. Analizom presretnutih komunikacija se nedvojbeno zaključuje da je ta osoba Fatmir Murtezi i da je telefonsku komunikaciju obavljao sa Čule Tihomirom.

Takođe, iz presretnutih komunikacija kao i iz rezultata provođenja posebnih istražnih radnji tajnog praćenja i tehničkog snimanja osoba, proizilazi da je optuženi Čule Tihomir na području općine Ljubuški preuzimao migrante i smještao ih u pansionere u vlasništvu ostalih pripadnika grupe, u kojima su migranti čekali dalje prebacivanje u R Hrvatsku.

Sud je, nadalje, iz provedenih dokaza utvrdio da je dalje prebacivanje migranata iz BiH u R Hrvatsku obavljano po prethodnom dogovoru između Čule Tihomira i Čepo Danijela, koji je iznajmljenim vozilima migrantre preko ilegalnih prelaza prevezio u R Hrvatsku. Navedeno proizilazi takođe iz relevantnih telefonskih komunikacija ostvarenih između Čule Tihomira i Čepo Danijela. Da je optuženi Čule učestvovao u izvršenju radnji krijumčarenja ljudi je vidljivo iz komunikacija ostvarenih sa Čepo Danijelom i Murtezi Fatmirom, a nakon što bi migranti stigli na područje Splita.

Sud se, razmatranjem uvedenih dokaza, uvjerio da svi prezentirani dokazi, kao i izjava optuženog o priznanju krivice, upućuju na zaključak da je optuženi, na način kako je to opisano izrekom presude, svojim radnjama ostvario sva bitna obilježja krivičnog djela Organizovani kriminal iz člana 250. stav 2. KZ BiH u vezi sa produženim krivičnim djelom Krijumčarenje ljudi iz člana 189. stav 1. KZ BiH.

Na pretresu za izricanje krivičnopravne sankcije, Tužilaštvo je navelo da s obzirom na sve okolnosti konkretnog slučaja, postoje osnovi za izricanje donje granice ugovorene kazne.

Branilac je predložio da se cijene okolnosti tačno navedene sporazumom, i da se optuženom izrekne kazna zatvora u trajanju od 2 ( dvije ) godine. Odbrana je naročito predložila da se optuženi oslobodi troškova krivičnog postupka, te u tom smislu uložila materijalnu dokumentaciju. Optuženi se saglasio sa izlaganjem svog branioca, te izjavio da se iskreno kaje, da se osjeća nelagodu što se nalazi pred sudom, i da više neće počinuti bilo kakvo krivično djelo.

Nakon ocjene svih činjenica i okolnosti koje su iznijete i detaljno obrazložene na ročištu za izricanje krivičnopravne sankcije, Sud je optuženom izrekao kaznu zatvora u trajanju od 2 (dvije) godine. Sud je optuženog oglasio krivim ocjenjujući da je djelo počinio u stanju uračunljivosti, i sa umišljajem tj. da je bila svjestana djela i htio njegovo izvršenje.

Odlučujući o krivičnopravnoj sankciji, a imajući u vidu odredbe krivičnog zakonodavstva BiH kojim je za ovo krivično djelo propisana kazna zatvora od najmanje 5 ( pet ) godina, kao i donju granicu raspona kazne dogovorenu sporazumom, Sud je zaključio da postoji dovoljno olakšavajućih okolnosti koje opravdavaju izricanje dogovorenog minimuma kazne, te da je izrečena kazna srazmjerna težini djela i stepenu krivice optuženog. Sud je zaključio da postoje naročito olakšavajuće okolnosti koje opravdavaju ublažavanje kazne ispod zakonskog minimuma, odnosno donje granice ugovorene kazne, te da je izrečena kazna srazmjerna težini djela i stepenu krivice optuženog. Sud se rukovodio i interesom pravičnosti u odnosu na izrečene kazne saoptuženima iz predmetnog spisa koji su u ranijim fazama postupka sklopili sporazume o priznanju krivice.

Pri tome je Sud kod optuženog od olakšavajućih okolnosti cijenio činjenicu priznanja izvršenja krivičnog djela, da je optuženi porodičan čovjek i otac dvoje maloljetne djece, da se nalazi u lošoj materijalnoj situaciji, da je narušenog zdravstvenog stanja, kao i njegovo korektno držanje pred Sudom. Prilikom odmjeravanja kazne optuženom Sud nije našao elemente koji bi se mogli okarakterisati kao otežavajuće okolnosti. Po ocjeni Suda, sve navedene okolnosti u svojoj ukupnosti čine osobito olakšavajuće okolnosti, te u smislu odredbe člana 49. KZ BiH, predstavljaju osnov za ublažavanje kazne ispod granice koja je zakonom propisana za počinjeno krivično djelo, te da će se ovom izrečenom kaznom zatvora ostvariti zakonom predviđena svrha kažnjavanja, kako u odnosu na samog optuženog, tako i u pogledu svijesti građana o štetnosti krivičnih djela i o pravednosti kažnjavanja.

Od optuženog se na osnovu člana 110. i 111. Krivičnog zakona BiH, a u vezi sa članom 392. Zakona o krivičnom postupku BiH, oduzima imovinska korist pribavljena izvršenjem krivičnog djela i to novac u iznosu od 433,00 eura (četiristotinetrdesettri eura ) odnosno njegova protuvrijednost izražena u konvertibilnim markama, prema važećem kursu Centralne banke Bosne i Hercegovine na dan uplate, te se optuženi obavezuje da navedeni novčani iznos uplati na račun države Bosne i Hercegovine putem jedne od poslovnih banaka u roku od 30 dana od dana pravosnažnosti presude.

Odredbe člana 110. KZ BiH, propisuju da niko ne može zadržati imovinsku korist stečenu krivičnim djelom, dok je članom 111. KZ BiH, određeno da će se svaka imovinska korist koja je pribavljena krivičnim djelom oduzeti od osobe čija je odgovornost utvrđena u

postupku koji se vodi protiv te osobe. Članom 392. ZKP BiH propisano je da se imovinska korist pribavljena krivičnim djelom utvrđuje po službenoj dužnosti.

Stečena imovinska korist utvrđena je u tačkama 1., 3. i 4. izreke presude.

Ukupnu imovinsku korist ostvarenu radnjom izvršenja krivičnog djela opisanog u tački 1. Izreke presude ( 520,00 eura ), Sud je podijelio na tri dijela, cijeneći da se u činjeničnom opisu kao saizvršioци navode i lica Filipović Nikola i Filipović Ante, te je na taj način za optuženog Čule Tihomora utvrđen iznos imovinske koristi od 173,00 eura.

Imovinsku korist iz tačke 3. Izreke presude u iznosu od 300,00 eura, Sud je podijelio na dva dijela, s obzirom da su u izvršenju radnje učestovali optuženi Čule Tihomir i Čepo Danijelem, od kojeg je, ranijem presudom Suda utvrđena imovinska koristi pribavljena krivičnim djelom u iznosu od 150,00 eura.( 300,00 / 2 ).

Sud je, za radnju opisanu u tački 4. izreke presude izračunao imovinsku koju je optuženi ostvario. Do visine iznosa te koristi Sud je došao matematičkom računicom, imajući u vidu ukupno ostvarenu imovinsku koristi u iznosu od 1.050,00 eura ( 3x 350 eura ), te taj iznos podijelio na lica koja su navedena kao izvršioци krivičnopravne radnje, pa je tako Sud utvrdio pojedinačnu visinu imovinske koristi, odnosno za optuženog u iznosu od 210,00 eura. S obzirom da je u činjeničnom opisu tačke 4. optužnice / izmjenjene sporazumom / Tužilaštvo izostavilo lica Filipović Nikola i Filipović Ante, a koja okolnost bitno utiče na utvrđivanje pojedinačne visine imovinske koristi koju su ostvarila lica iz predmetne tačke optužnice, Sud je našao da bi prihvatanjem izmjene činjeničnog opisa tačke 4. predmetne optužnice, na način kako je to Tužilaštvo uradilo, uticalo i dovelo u nepovoljniji položaj optuženog Čule Tihomira u odnosu na optužene Čepo Danijela Jahura Feđu koji su oglašeni krivim ranijim presuda po sklopljenom sporazumu o priznanju krivice, gdje Tužilaštvo nije izostavilo lica Filipović Nikola i Filipović Antu i gdje se imovinska koristi dijelila na pet jednakih dijelova. S toga je Sud, cijeneći interes pravičnosti, utvrđenu imovinsku koristi ostvarenu radnjama izvršena pomenute tačke izreke presude, podijelio na 5 dijelova.

U odnosu na ostale krivičnopravne radnje, opisane u ostalim tačkama izreke presude za koje je optuženi oglašen krivim, Sud nije imao relevantnih pokazatelja, niti ih je Tužilaštvo prezentiralo, zbog čega Sud nije ni po slobodnoj ocjenu mogao odrediti visinu imovinske koristi.

Odredbom člana 56. stav 1. KZ BiH, propisano je da će se vrijeme provedeno u pritvoru, kao i svako lišenje slobode u vezi sa krivičnim djelom uračunati u izrečenu kaznu zatvora, te je Sud, na osnovu navedenog člana, optuženom Čule Tihomiru u izrečenu kaznu zatvora uračunao vrijeme provedeno u pritvoru, u periodu od 15.05.2013. godine do 31.05.2013. godine.

Član 188. stav 1. ZKP BiH propisuje da će se u slučaju kada Sud optuženog ogłosi krivim, izreći u presudi da je dužan da naknadi troškove krivičnog postupka. S obzirom da je optuženi presudom oglašen krivim, na osnovu citirane zakonske odredbe, optuženi se obavezuje na naknadu sudskog paušala u iznosu od 200,00 KM, koji je iznos optuženi dužan platiti u roku 15 dana od dana pravosnažnosti presude.

S druge strane, troškovi ovog krivičnog postupka su i troškovi učinjenih za odbranu po službenoj dužnosti i troškovi za svjedoke, za koje troškove je Sud u smislu člana 188. stav 4. ZKP BiH odredio da padaju na teret budžetskih sredstava.

Naime, Sud je iz dostavljene dokumentacije odbrane -Uvjerenje, kojim se potvrđuje da Čule (Mile) Tihomir nije upisan kao nosilac prava u katastarskom operatu, Grad Mostar, Odjel za urbanizam i građenje, Služba za katastar, broj: 07-32-2012/15-2 od 08.09.2015. godine; Kućna lista za Čule Tihomira, od dana 08.09.2015. godine; Obračun plate za 8/2015-1 za Čule Franku (supruga optuženog), Sveučilišna klinička bolnica u Mostaru; Otpusno pismo na ime Čule Zora (kći optuženog), Sveučilišna klinička bolnica u Mostaru, Klinika za dječije bolesti, Klinički odsjek za neuropedijatriju, od 07.01.2015. godine; Kopija prve stranice zdravstvene knjižice na ime Čule Tihomir (iz koje je vidljivo da je supruga optuženog nosilac osiguranja ), zaključio da bi obavezivanjem optuženog da nadoknadi nastale troškove bilo dovedeno u pitanje izdržavanje kako optuženog, tako i osoba koje je dužan izdržavati.

**Zapisničar**

**Ilvana Hadžić**

**PREDSJEDNIK VIJEĆA  
SUDIJA**

**Hasija Mašović**

**POUKA O PRAVNOM LIJEKU:** Protiv ove presude nije dozvoljena žalba na izrečenu krivičnopravnu sankciju, niti žalba na vrstu procesa. (član 231. ZKP BiH). Iz drugih razloga propisanih Zakonom o krivičnom postupku, žalba na ovu presudu može se podnijeti u roku od 15 dana od dana dostavljanja pismenog otpavka presude